

EDITORIAL

Ibuksas ngan atuhan an mga kontra-katawhan nga larang han rehimen Marcos II

Labot ha butaray nga pagbinuwa, panhugay ngan panlibo, nahimo nga makalingkod ni Ferdinand "Bongbong" Marcos Junior ha Malacañang pinaagi han paghimo hin mga saad kasumpay han agrikultura, trabaho, ngan pankatilingban nga serbisyo -- mga mapaso nga isyu han katawhan. Waray pa hiya mag-usa kabulan ha poder, nabubuksas na ini komo buwa, pamostura, ngan pagsakay ha popular nga sentimyento han publiko. Nati-kaklaro nga pagagrabihon la niya an mga mapan-gipit ngan pakuri nga palisiya han naglabay nga rehimen Duterte.

Ginpapamunuan ni Marcos an usa nga gubyrno nga bangkrap ngan ludlod ha krisis ha ekonomiya. Samtang, gin-aantos han katawhan an waray hunong nga umento ha presyo han mga produkto nga petrolyo ngan pagkaon. Duro an ira karuyagon nga batunon han gubyrno an ira mga makatadungan nga demanda.

Ano an baltok kaupay nga solusyon nga ginduduso han mga teknokrata han rehimen Marcos? Mas mangutang, magdugang hin buhis,

ngan magtipid ha serbisyo para ha katawhan. Padayon nga buhis an mga produkto nga petrolyo tungod kay waray kuno kwarta an gubyrno. Ha butnga han kawaray hin pakabuhitanggalon ha trabaho an maabot ha duha kamilyon nga ordinaryo nga empleyado han gubyrno. Tanggalon liwat ha listahan han benepisyaryo an 1.3 kamilyon nga mga nakarawat hin sensilyo nga ayuda tikang ha Pantawid Pamilyang Pilipino Program (4Ps) tungod kay "diri na hira kablás." Diri

"Ibuksas..." sundan ha paypay 2



20th IB ngan 63rd IB, gin-ambus ha Mapanas



GIN-AMBUS HAN
BAGONG Hukbong
Bayan - Rodante
Urtal Command
(BHB-RUC) an mga

nag-ooperasyon nga tropa han 20th Infantry Battalion ngan 63rd IB ha Barangay Magsaysay, Mapanas, Northern Samar hadin Hulyo 5. Ha inisyal nga report, pito nga pasista nga tropa an samaran hini nga opensiba.

Sigon kan Amado Pesante, tagapagyakan han BHB-RUC, kabatunan ini han hukbo han katawhan ha waray hunong nga panalapas ha tawhanon nga katungod ha Pacific nga erya han prubinsya. Iginkalipay naman han katawhan hini nga dapit han Northern Samar an rebolusyunaryo nga sirot nga iginpatok ha mga naghadi-hadian nga pasista ha ira mga komunidad.

Samtang, gintawag naman ni Karlos Manuel han BHB-Eastern Visayas (Efren Martires Command) nga "madinaugon" ngan "napapanahon" ini nga taktikal nga opensiba ha butnga han pira na kabulan nga nakapokus ngan sostenido nga atake han militar ha urhi nga tulo kabulan ni Duterte.

Ginpahimuwa hini nga opensiba an deklarasyon han 8th Infantry Division nga damo na nga baryo an "malimpyo" ha rebolusyunaryo nga kagiusan ha Pacific. Kasumpay ini nga opensiba ha pagpakyas han "urhi nga kwarter" nga kampanya han Provincial Task Force-Elcac nga puuhon an rebolusyunaryo nga kagiusan ha prubinsya. **L**

Ambus ha Pacific, tampalo ha mga berdugo

Pira la kaadlaw tikang han ighambog ha kahanginan han kumander han 8th Infantry Division nga hi Major General Edgardo de Leon nga "nalimpyuhan" na ha impluwensya han rebolusyunaryo nga kagiusan an mga baryo ha erya nga Pacific han Northern Samar, ginhampak hira han Bagong Hukbong Bayan-Rodante Urtal Command (BHB-RUC) hin usa nga madinaugon nga ambus ha Barangay Magsaysay, Mapanas hadin Hulyo 5.

Diri mamenos ha pito nga pasista nga kasundaluhan tikang ha 20th Infantry Battalion ngan 63rd IB an nasamaran hini nga opensiba.

Ha sobra nga kaawod ngan desperasyon nga tahuban an ira kaperdihan, sustenido nga ginpasamwak ni de Leon ha lokal ngan nasyunal nga masmidya an mga talapas kunuhay han BHB. Baga hin pikoy an pasista nga kumander ha pauru-utro nga pagkunderan han paggamit hin *command-detonated explosive* (CDEx) nga talapas kuno ha internasyunal nga balaudnon ngan kaangayan imbestigaran ngan kasuhan han Commission on Human Rights.

Kundi ginbubuksas han 8th ID an katapang hini ha balaudnon ha kondukta han gerra. Lehitimo nga higamit ha gerra an CDEx tungod kay diri ini *contact-detonated* ngan ginpupuntirya ha mga lehitimo nga armado nga kaaway. Sugadman, waray katungod

an CHR nga imbestigaran, ngan labina nga kasuhan, an BHB subay ha Comprehensive Agreement on the Respect for Human Rights and International Humanitarian Law o CARHRIHL.

Ha ungod, gin-gagamit la han AFP an CHR agud mabirik an atensyon han publiko tikang ha ira madarahug nga terorismo ha katawhan. An kaangayan imbestigaran, amo an AFP nga nahulog hin dagko nga bomba tikang ha kahanginan ngan paturapak nga nanganganyon ngan namumusil hin waray pagtagad ha mga sibilyan.

Kundi buta-bungol an CHR ha mga talapas han AFP. Sanglit iginkalipay han katawhan ha erya han Pacific an madinaugon nga pagpatok hin rebolusyunaryo nga hustisya ha mga berdugo nga pasista han 20th IB ngan 63rd IB.

Nahireport han BHB-RUC an mga



krimen han militar ha mga bungto han Mapanas, Palapag, Gamay, ngan Lapi-nig. Tikang pa hadton naglabay nga tuig, naghadi-hadian an mga terorista nga kasundaluhan ha maabot 63 nga barangay hini nga parte han prubinsya.

Ha luyo han saywar nga propaganda han militar nga "maluya" na an BHB, ginpamatud-an han ambus ha Mapanas an hitaas nga kapas ha pag-ato han hukbo ngan han masa. Maabot an adlaw nga lulumuson han sulog han pakigbisog han katawhan han Dagat Pasipiko an mga terorista nga berdugo han pasista nga estado. ■

"Ibuksas...", *tikang ha paypay 2*

naman lakip ha igtitipid an badyet han militar ngan pulis.

Ano naman an plano ni Marcos para ha agrikultura? Ginbutang niya an kalugaringon komo sekretaryo ngan nagsaad nga hihimuon nga ₱20 kada kilo an presyo han bugas ha merkado. Tiunan-o niya ini hihimuon hin diri ginbubungkag an monopolyo ha tuna han dagko nga agaron maytuna, nanhahatag hin mahinungdanon nga ayuda ha produksyon ha mga kabras nga paraguma, ginsosolbar an atrasado nga sistema han pag-uma, ngan ginlilimitaran an waray wantas nga importasyon han bugas?

Tungod ha grabe nga kakurian, natikadamo an naaaghat nga umapi ha

armado nga rebolusyon agud atuhan an paniniyupi ha ilarum han presente nga sistema. Usa nga pangilal-an hini an madinaugon nga ambus hadin naglabay han Pula nga hukbo ha Mapanas, Northern Samar. Kundi ano an baton dinhi han rehimen Marcos? Igsalikway an ertestorya pankamurayawan, igdiwara an gamot han armado nga sumpakia, ngan igduso an "lokal nga kamurayawan," usa nga daan nga taktika han pasista nga panmuypoy, saywar ngan pagpasurender ha kabaryuhan.

Ha syahan nga State of the Nation Address (SONA) ni Marcos ha Hulyo 25, komprehensibo niya nga igpaplantar an mga mayor nga plano ngan programa han iya rehimen. Hini nga

adlaw, kinahanglan kadungan liwat nga igpakita han katawhan an pinakamakusog nga pagsukna ha rehimen Marcos II. Kinahanglan iglansar an tanan nga porma han pag-ato, sikreto man o dayag, ligal man o ilegal, agud igrehistro an tinuod nga kamutangan han katawhan ngan ira pagkulaw ha mga larang ni Marcos. Bisan kahuman han SONA, kinahanglan pursigido nga adman, ibuksas, ngan suknaon an kada kontra-katawhan nga palisiya.

Kinahanglan ini pangunahan han mga rebolusyunaryo nga pwersa. Ginlalauman an Bagong Hukbong Bayan nga manguna ha mga taktikal nga opensiba nga magpapakita han pag-ato han katawhan. ■

Todo-gerra kontra ha BHB ha Eastern Visayas, pakyas

Gindeklara han Bagong Hukbong Bayan (BHB) ha Eastern Visayas nga hul-os hini nga ginpakyas an dedlayn han rehimen US-Duterte nga hul-os nga puuhon an rebolusyunaryo nga kagiusan ha rehiyon ha katapusan han termino hini hadton Hunyo 30.

Ha usa nga pahayag, ginsering ni Ka Karlos Manuel, tagapagyakan han Efren Martires Command nga rehiyunal nga kumand han BHB, nga pakyas an tanan nga pabarubag-o nga dedlayn han rehimen Duterte ngan han 8th Infantry Division kontra ha BHB ha 2019, 2021, ngan 2022. Ginpakyas liwat han BHB an ira ginpaluros nga target nga "limitaran" o "ibanan" na la an pwera han Pula nga hukbo ha rehiyon.

Ginpahimuwa ni Manuel an mga "nakab-ot" kuno han 8th ID ha todo-gerra kontra ha BHB, sugad han ihap han mga "napasurender" nga ha aktwal mga sibilyan, mga baryo nga "nalimpyo" na ha BHB nga ha aktwal

napiritan la, ngan mga kalsada nga natindog kuno nira nga ha ungod surok han korapsyon han militar. Sering pa ni Manuel, nagpapabilin nga nakatindog an tanan nga yunit han BHB ha tanan nga prubinsya ha rehiyon, tikang ha Northern Samar tubtub ha Southern Leyte. Buwa liwat an deklarasyon han 8th ID nga may nabuhag bisan usa nga prente gerilya han BHB.

Ginsaludaran han BHB-EMC diri la an mga Pula nga mangaraway kundi sugad liwat an masa nga mabayanihon nga gin-ungbawan an todo-atake han mga pasista nga tropa ha kabaryuhan. Kalakip dinhi an terorista nga panmomba ngan panganyon,

panmatay, tortyur ngan pangabuso, interrogasyon, pagpasurender, pagpakop ngan pagkordon ha mga komunidad. Nagin ayat liwat an pagpakyas ha mga larang han mga traydor ngan aktibo nga nakigbuligay ha kaaway.

"Dugang nga napanday an masa ngan hukbo han katawhan agud mas magkaurusa ngan magpursige ha dalan han gerra han katawhan," sering ni Manuel. Amo ini an ira puhunan para ha pag-atubang ha masunod nga rehimen Marcos II.

Ha pareho nga pahayag, ginsaludaran han BHB-EMC an ngatanan nga masa, Pula nga mangaraway ngan kumander, mga kaapi ngan kadre han Partido nga naghalad han ira kinabuhi para ha rebolusyon. Gintagan hin nalalain nga pagsaludar hira Ka Mariano Adlao, Ka Antonio Cabanatan, Ka Abdias Guadiana, ngan an 22 nga martir han Dolores. **L**

HA KAMATUORAN

Pasista nga militar, ulang ha aragtubang nga klase ha kabaryuhan

TIUNAN-O MAN MAKAKA-ATENDIR ha aragtubang nga klase an mga estudyante kun an ira mga eskoylahan ngan komunidad okupado han pasista nga militar?

Ini an pakiana han damo nga kabatan-unan-estudyante, magturutdo, ngan kag-anak ha konteksto han gintatarget nga 100% nga pag-abre han pisikal nga klase ha Nobyembre.

Ha kamatuoran, hirayo kaupayan hul-os nga balik-eskoyla ha ngatanan nga eskoylahan samtang ginlasurbo an kabaryuhan kun diin naukoy an mayoriya han kabatan-unan. Padayon nga mariringgal an pagaram han mga estudyante samtang padayon an panmomba, panganyon,

pangistraping, ngan bisan an panmatay ha mga nag-uuma nga kabataan sugad han nahitabo ha Barangay Roxas, Catubig hadin Pebrero.

Kriminal nga ginpasibayan han reaksyunaryo nga gubyrerno an pangandam han aragtubang nga klase ha kabaryuhan. Kulang pa gihapon an mga klasrum, nars, klinik, *protective equipment*, ngan mga pasilidad para ha sanitasyon samtang nag-aantos an mga magturutdo hin himubo nga sweldo ngan guti nga

alawans ha butnga han damo nga buruhaton ngan hilawig nga oras ha pagtrabaho.

Naoobligar an mga kag-anak nga magpartisipar ha mga pintakasi ngan mag-aragmot para ha pag-ayad han klasrum ngan iba pa nga pasilidad. Doble naman an gastos han mga estudyante tikang ha mga tay-aw nga lugar tungod han waray hunong nga paghitaas han presyo han lana ngan paplitan.

Hugot gud nga kasumpay han pag-abre han klase an kamutangan han tawhanon nga katungod ha kabaryuhan, an kapasibayan han gubyrerno ha pag-atubang han Covid, ngan an pan-ekonomiko nga krisis han katilingban. **L**

Biktima han masaker ha Sag-od, iligal nga gindetiner

Usa nga biktima han usa ha mga pinakabrutal nga masaker ha panahon han diktadura ni Ferdinand Marcos Senior an iligal nga gin-aresto ngan gindetiner han mga pwersa han estado ha Northern Samar, pira kaadlaw antes an inagurasyon han iya anak nga hi "Bongbong" Marcos Junior komo bag-o nga niyutiyo nga presidente.

Napiritan hi Enriqueta Toling, usa nga kilalado nga biktima han 1981 nga masaker ha Barangay Sag-od, Las Navas, nga magbayad hin diri mamenos ha ₱40,000 agud makagpiyansa kuno ha mga hinimu-himo nga kaso kontra ha iya ngan temporaryo nga makagawas ha prisuhan, sigon ha report han Bagong Hukbong Bayan-Northern Samar (Rodante Urtal Command o BHB-RUC).

Upod hi Toling ha 25 nga residente han Sag-od nga gin-obligar han Armed Forces of the Philippines (AFP) nga "magreport" ha militar ha bungto kasunod han taktikal nga opensiba han Bagong Hukbong Bayan ha gawas han ira baryo hadton Hunyo 22.

Sigon ha pinakaurhi nga report, nakadetiner la gihapon hi Toling. Diri liwat klaro kun ano an aktwal nga kaso nga ginsalawad ha iya. Waray hiya kriminal nga rekord ha naglabay.

Ha mga sibilyan nagmamalakabulos an mga pasista nga tropa kahuman hira mahiagum hin susrunod nga kaperdihan ha dalagan han ira 400-katropa nga panmilitar nga kampanya kontra ha BHB ha kagugub-an nga karadtuan han mga tawo tikang ha Sag-od ngan Barangay San Isidro.

Tungod ha presensya han militar, inundang na an mga parag-uma han Sag-od, San Isidro ngan mga kasapit nga baryo ha Las Navas ha pagtrabaho ha uma. Ginbayaan liwat nira an ira bablay ha kahadlok nga mainterogar o piriton nga magsurender han mga naglilibot nga sundalo. Tikang pa hadton temprano nga parte han Mayo na-report an presensya han militar ha umhanan ngan antes pa hini, aada na

hira ha sakob mismo han mga baryo.

Ginkundenar ni Ka Amado Pesante, tagapagyakan han BHB-RUC, an AFP ha paggamit ha baga-Marcos nga taktika han pagbulos ha mga diri armado nga sibilyan kahuman mahiagum hin kaperdihan ha Pula nga hukbo.

Kwarenta katuig na an naglabay han waray kaluoy nga istrapingon han mga paramilitar nga tropa han diktadura nga Marcos an diri mamenos ha 46 katawo kahuman hira mapakyas ha pamiling ha usa nga kunuhay "Kumander Racel" han BHB.

Hi Toling, nga 19 anyos pala hadto, maswerte nga nakatalwas kaupod an iya minasuso nga puya. Kahuman mabuksas ha publiko an makarimadima nga panhitabo, nagserbe hi Toling komo nawong han usa nga alyansa han mga biktima ngan kaurupdan han masaker ha Sag-od. Usa hiya ha damo nga tingog nga nagbuksas ha mga pandarahug han balaud militar ni Marcos ngan waray kapagal nga nakigbisog para ha hustisya ha ngaran han masa nga parag-uma nga biktima han kamadarahug han estado.

Kundi bisan kun napabagsak an diktadura nga Marcos ngan pira nga niyutiyo nga rehimen na an inagi, biktima la gihapon hi Toling sugad liwat an iya mga kahimaryo ha Sag-od han pasismo han estado ngan paghahadi han militar ha mga baryo.


Dunot gihapon nga katilingban

Nagsering hi Pesante nga an sugad nga palisiya han estado sigurado nga magpapadayon ha ilarum han dunot

nga bagakolonyal ngan bagapyudal nga katilingban. Amo man ngani ini an nagpahimugso ha diktador nga hi Marcos Senior, nagpabalik ha iya pamilya ha poder, ngan hul-os nga nagpabalik ha ira ha pungkay han estado poder pinaagi kan Marcos Junior.

"An pasista nga terorismo han estado usa nga desperado nga pag-arentar han imperyalismo nga US ngan lokal nga naghahadi nga klase, labina han naghahadi nga paksyon nga Marcos-Duterte, nga igpabilin an presente nga sistema ha bisan ano nga pamaagi sugad han pagpamingaw ha oposisyon ngan paglansar hin todo-gerra nga natarget liwat ha mga sibilyan," sering ni Pesante.

"[Kundi] an natikagrabe nga pasista nga pangatake han AFP, ha ungod, nagdudurot han mga kundisyon nga pabor ha pagdako han BHB ngan ha diri malilikyan nga kapakyasan han AFP," pagtapos ni Pesante. ■



Death penalty ngan ROTC

Puthaw nga kamot ni Marcos II

Plano nga igbanhaw ni Bongbong Marcos an mga pasista nga balaud nga hadto na gin-atuhan ngan ginbasura han katawhan. Iginpagawas han iya rehimen komo prayoridad nga mga balaudnon an pagbalik han *death penalty* (penalidad nga kamatayon) ngan an proposisyon nga nag-oobligar han Reserved Officers' Training Corps (ROTC) ha mga eskoylahan.

Brutal nga atake ha mga kabras an proposisyon nga *death penalty*. Nakatadong ini diri para ha mga kriminal ngan parupanmatay sugad kan Rodrigo Duterte ngan ha familia Marcos kundi ha mga kabras nga waray sadang nga kapas makaakses hin ligal nga serbisyo ngan madepensahan an kalugaringon ha burges nga husgado.

Sugad han madarahug nga gerra kontra-druga han rehimen Duterte, gin-gagamit nga pasangilan han rehimen Marcos an pagpuyoy ha druga agud karawaton han publiko an *death penalty*.

Kundi ha kamatuoran, napamatud-an han gerra ni Duterte nga pakayas an puthaw nga kamot agud masolbar an druga ngan kriminalidad. Lugod, gagamiton an *death penalty*

agud tarhugon an mga kaway hini ha pulitika, an hiluag nga oposisyon, ngan an rebo-lusyunaryo nga kagiusan.

Sugadman, gintutumuyo han pagbanhaw ha ROTC an dugang nga pagmilitarisa han mga eskoylahan ngan targeton an mga kabatan-unan nga estudyante ngan kagiusan han magtuturdo nga kritikal ha administrasyon. Hadto pa ini gintipahan han katawhan kahuman patayon hi Mark Welson Chua, usa nga estudyante ha University of Santo Tomas, nga nagbuksas han mga anomaliya han ROTC.

Ilarum kan Marcos Junior, ginduso niya an ROTC dara han kahadlok nga lumarab an mga demonstrasyon han mga estudyante sugad han



First Quarter Storm ha panahon han diktadura han iya amay nga hi Marcos Senior.

Kun maipatuman, maghahatagwada an ROTC ha sistematiko nga panalapas ha mga katungod han mga estudyante, mga magtuturdo, ngan iba pa nga alyado nga sektor ha akademya. Magseserbe ini nga aragian han *red-tagging*, pangespia pinaagi han Student Intelligence Network (SIN), ngan kontra-insurhensiya nga indoktrinasyon ha mga eskoylahan. ■

Pagpamingaw ha midya, sangkap ha tiraniya

TEMPRANO PALA HA iya termino, ginbubuksas na ni Bongbong Marcos an iya larang ha tiraniko nga paghahadi. Pira kaadlaw antes an iya inagurasyon komo ika-17 nga niyutiyo nga presidente han reaksyunaryo nga gubyerno, iginpaserra han National Telecommunications Commission an mga *website* han Partido Komunista ng Pilipinas, Bulatlat, Pinoy Weekly, Rural Missionaries of the Philippines, Save Our Schools Network, ngan 22 pa nga progresibo ngan kritikal nga espasyo ha *internet*.

Bisperas han iya inagurasyon, ginpaserra han Securities and Exchange Commission an kilalado nga kontra-Duterte ngan kontra-Marcos nga *website* nga Rappler.

Samtang, ha adlaw mismo han iya paglingkod ha poder, nagdeploy

hiya hin yukot-yukot nga kapulisan, ginbalabgan an mobilidad han mga nagprotesta, ngan nagmobilisa hin mga instigador agud igsabotahe an mga panmasa nga aksyon nga nagbuksas han iya diri lehitimo nga pagpapisyon ha Malacañang.

Sigon kan Fr. Santiago "Ka Sanny" Salas, tagapagyakan han National Democratic Front-Eastern Visayas, an pagpamingaw ha masmidya ngan pagtalapas ha katungod ha pagpahayag han katawhan amo an mga sangkap para ha tiraniko nga paghahadi, sugad han gin-imponer nga balaud militar han iya amay hadton dekada 1970.

Agud mamonopolisa an poder pampulitika ha kamot han ira familia, sistematiko nga ginpapamingaw ni Marcos II an oposisyon ngan ngatanan nga hulga ha iya tiraniko nga paghahadi. ■

Gumios na Kita

ha tono han "DJ ng Aking Buhay"

Kanta nga ginkomposo ni Kasamang Keana

Pula nga mangaraway han BHB-Arnulfo Ortiz Command

Maiha na nga panahon
An masa, grabe an kakurian
Napupukaw, nagios han kamutangan ta
Naghihingyap han katalwasan ta

Militarisasyon nga kampanya
Mapanmuypoy han hiluag nga masa
Kun napatuman ha kabaryuhan may aset,
intel pa
Angay igbuksas ngan atuhan na

Koro:

Gumios na kita
Bug-uson na, kusog han masa
Gumios na kita
Pakyason an terorista nga programa
Kay ha yana, gin-aayat kita
Magkaurusa, ngan tumindog kita

Waray kita surendiray
Waray lat mapahugay
Kahadlok ungbawan, ay' pagamit ha
kaaway
Angay pinsaron, umato kita!

Koro 2:

Gumios na kita
Talwason na, hiluag nga masa
Gumios na kita
Pakyason an terorista nga programa
Kay ha yana, gin-aayat kita
Aton ipasulong DRK nga linya

Kay ha yana, gin-aayat kita
Sulong rebolusyon, bag-uhon an sistema

